

apa yang diketengahkan dalam kajian ini berkaitan penglibatan tersebut. Tokoh ini kini menikmati segala usaha dan pencapaian yang telah diraih puluhan tahun lalu dan melapangkan banyak waktunya di kediaman beliau di Sri Bahagia Petra Jaya Kuching.

### **BAB III**

#### **SUMBANGAN ABDUL RAHMAN YA'KUB DALAM DAKWAH DI SARAWAK**

Dakwah adalah kerja yang besar dan untuk menggerakkannya memerlukan banyak tenaga yang terlibat dan bekerja secara berpasukan. Dakwah bukanlah kerja yang dapat dilakukan secara individu kerana sasaran yang hendak dicapai adalah besar.

Menurut Rozhan Othman tugas dakwah memerlukan usaha yang serius, dan tersusun rapi, memerlukan kesungguhan, istiqamah, perancangan serta pengurusan yang mantap. Tugas dakwah tidak akan mencapai prestasi yang maksima sekiranya dilakukan secara separuh masa atau menjadikan ia hobi ketika waktu lapang atau kerja yang dilakukan seminggu sekali atau suatu usaha pada

ketika mata telah mengantuk.<sup>39</sup>

Bab ini akan membincangkan mengenai organisasi dakwah dengan nukilan nukialn ayat al-Qur'an dan hadits sebagai asas. Bab ini juga membincangkan perbandingan di antara kerja dakwah yang dilakukan secara individu dengan secara organisasi. Perbincangan mengenai perkara ini mempunyai relevansi penting dalam memerihalkan sumbangan tokoh ini melakukan transformasi gerakan dakwah di Sarawak daripada secara individu oleh kalangan agamawan kepada gerakan berstruktur dan tersusun rapi.

Sebelum melanjutkan diskusi tentang organisasi dakwah, penulis terlebih dahulu mengemukakan sejarah singkat negeri Sarawak sebagai pengantar dan untuk menampakkan keutamaan kenapa pergeseran dakwah harus dilakukan di Sarawak. Sejarah sentiasa menjadi elemen terpenting dalam perjalanan sesebuah tamadun kerana ia menyebutkan asal muasal tamadun tersebut. Merujuk kepada Ibn Khaldun;

...Sejarah akan membuat kita faham akan hal ehwal sesuatu bangsa yang terdahulu kerana ia tercermin melalui perilaku mereka. Melalui sejarah kita dapat mengetahui biografi para nabi, sesebuah kerajaan dan dasar-dasar raja-rajanya. Ia membolehkan sesiapa yang berminat menteladani contoh-contoh sejarah sebagaimana dalam bidang agama dan perkara-perkara duniawi...<sup>40</sup>

---

<sup>39</sup> Rozhan Othman, Pengurusan Dakwah, (Bangi Selangor Darus Ehsan: Ummah Media Sdn. Bhd., 1990), 11

<sup>40</sup> Dewan Bahasa dan Pustaka, Muqadimah Ibn Khaldun, (Kuala Lumpur: Dewan Bahasa Dan Pustaka Kementerian Pendidikan Malaysia, 1992), xix

Penulis membagikan sejarah Sarawak kepada tiga fasa yaitu Sarawak Lama, Pra-Merdeka dan Pasca Merdeka.

#### **A. Sarawak Lama**

Sarawak adalah negeri yang terletak di bahagian timur Malaysia dipisahkan oleh Laut Cina Selatan, yaitu di sebahagian utara Pulau Borneo. Pulau Borneo merangkumi tiga buah negara yang berjiran yaitu Malaysia, Indonesia dan Brunei Dar al-Salam. Pulau Borneo yang dikenali sekarang pada asalnya telah wujud dari sekian lama dengan sebutan Brunei. Lama kelamaan sebutan tersebut bertukar menjadi Borneo di sekitar abad ke 17M. sama ada perubahan sebutan itu berlaku dengan sendiri ataupun merupakan sebuah perancangan pihak tertentu yang berusaha menghilangkan nilai-nilai keIslaman Kesultanan Brunei terhadap Borneo, adalah sesuatu yang belum dapat dipastikan.<sup>41</sup>

Pada zaman kegemilangan Kesultanan Brunei, Sarawak adalah sebahagian daripada jajahan Kesultanan Brunei yang luas menganjur dari Tanjung Datu (Sarawak) di selatan hingga ke Manila (Filipina) di utara. Secara tidak langsung pengaruh dan nilai-nilai Kesultanan Brunei tersebar ke seluruh empayar yang dijajah termasuk aspek agama. Oleh yang demikian perkembangan Islam di Sarawak berkait rapat dengan peranan para pembesar

---

<sup>41</sup> Izziah Suryani Arshad et al., "Borneo Sebelum Penjajahan Barat: Kajian dari Sudut Penguasaan Politik" dalam *Prosiding Nadwah Ulama Nusantara II Sumbangan Ulama dan Tokoh Agama Borneo*, Farid Mat Zain et al (eds.) (Bangi: Fakulti Pengajian Islam Universiti Kebangsaan Malaysia, 2003), 322

Kesultanan Brunei dalam rangka menyahut tanggungjawab dakwah yang suci dan ketaatan mematuhi titah istana.

Perkembangan Islam di Brunei serta wilayah jajahannya begitu maju terutamanya semasa zaman pemerintahan Sultan Brunei III yaitu Sultan Ali Bilfakih.<sup>42</sup> Beliau bertanggungjawab terhadap penyebaran Islam di Brunei melalui pedagang-pedagang Arab dan juga melalui perkahwinan silang di antara pedagang asing dengan wanita tempatan.<sup>43</sup>

Sememangnya Kesultanan Brunei merupakan kerajaan yang luas, berdaulat dan perkasa ketika itu. Bagi memastikan pentadbiran jajahan tersebut berjalan dengan baik, pihak istana melantik wakil-wakil istana yang digelar “pangiran” untuk mentadbir dan mengurus di kawasan-kawasan jajahan.

Hasil mahsul yang diperolehi dari tempat-tempat berkenaan akan disumbangkan kepada pihak sultan pada kadar yang tertentu dan juga untuk kegunaan setempat. Sejak sekian lama keadaan pemerintahan Kesultanan Brunei berjalan dengan baik, aman serta tiada masalah sehinggalah berlaku

---

<sup>42</sup> Sultan Ali Bilfakih : Sebelum menjadi sultan beliau dikenali dengan nama Syarif Ali. Sultan Sharif Ali ibnu Sharif Ajlan (1425-1432) naik takhta pada TM 1425 bagi menggantikan mertua baginda, Sultan Ahmad yang tidak mempunyai waris (Putera). Baginda dijunjung untuk menjadi sultan atas persetujuan pembesar-pembesar negara dan rakyat Brunei. Baginda keturunan arab, berasal dari Taif. ‘Pedang Si Bongkok’ yang dibawa baginda bersama ke Brunei itu membuktikan baginda pernah menjadi amir Makkah yaitu Al-Amir Sharif Ali bin Sharif Ajlan bin Sharif Rumaithah bin Sharif Muhammad Abu Numaie Al-Awwal, mempunyai jurai krturunan daripada Nabi Muhammad SAW melalui cucunda baginda, Sayyida Hasan. Memandangkan jasa dan kearifan baginda menyebarkan ajaran Islam maka baginda dijodohkan oleh Sultan Ahmad dengan puteri baginda, Puteri Ratna Kesuma. Baginda lindung (mangkat) pada TM 1432 dan digantikan oleh putera baginda, Pangiran Muda Besar Sulaiman – <http://www.history-centre.gov.bn/sultanbrunei.htm> , dicapai 10 Oktober 2012

<sup>43</sup> Md. Amin Haji Abdul Rahman (2003), “Sejarah dan Perkembangan Islam di Sarawak Sebelum Merdeka”, dalam *Prosiding Nadwah Ulama Nusantara II Sumbangan Ulama dan Tokoh Agama Borneo*, Farid Mat Zain *et al* (eds.) (Bangi: Fakulti Pengajian Islam Universiti Kebangsaan Malaysia, 2003), 434-436

keonaran yang berpunca dari salah seorang wakil yang bernama Pangeran Indera Mahkota. Beliau menindas masyarakat setempat dan memaksa mereka bekerja kuat untuk mendapat keuntungan peribadi beliau. Masyarakat yang tidak tahan dengan keadaan tersebut akhirnya bangun memberontak melawan beliau.<sup>44</sup>

Kekacauan yang pada peringkat awalnya hanyalah diibaratkan riak-riak air di tasik akhirnya menjadi badai di lautan luas dan tidak terkawal lagi. Pengeran Muda Hashim yang ketika itu menjadi Wakil di Sarawak<sup>45</sup> telah diamanahkan untuk menangani Pangeran Indera Mahkota tetapi kurang berhasil.

Pada tahun 1839 James Brooke<sup>46</sup> datang ke Sarawak karena menjadi

---

<sup>44</sup> Muhammad Rakawi Yusuf (1890-1936), *Hikayat Sarawak*, ditransliterasikan dengan pengenalan oleh Nordi Ahcie (Kuala Lumpur: Penerbitan Universiti Malaya, 2011), 74-75

<sup>45</sup> Sarawak yang dimaksudkan ketika itu hanyalah sekitar Bandar Kuching sekarang – Abdul Razak Abdul Kadir, “Sejarah dan Perkembangan majlis Islam Sarawak Dalam Pendidikan Dan Zakat (1955-1991)” (Tesis Kedoktoran Jabatan Sejarah Dan Tamadun Islam, Akademi Pengajian Islam, Universiti Malaya, 2011), 30

<sup>46</sup> James Brooke dilahirkan di Banares, pada 29 April 1803 di India. Ketika itu bapanya sedang berkhidmat dengan Syarikat Hindia Timur Inggeris. Pada usia dua belas tahun ia dihantar bersekolah di England. Semasa beliau belajar secara kebetulannya pelajaran itu telah diwartakan sebagai satu pengukuran pangkat dalam tentera Bengal bagi tahun 1819. Selepas tamat pengajian James Brooke juga telah berkhidmat dengan cemerlang dalam Perang Inggeris-Belanda Pertama dan pada awal tahun 1825, ia mendapat cedera parah lalu dihantar pulang ke negeri asal.

Apabila bapa James Brooke meninggal dunia, beliau meninggalkan wang sebanyak 30,000 paun kepada anaknya James Brooke. Pada mulanya ia tidak tahu apa yang harus dibuat dengan wang sebanyak itu, namun pada Mac 1836, James Brooke membeli sebuah kapal layar yang bernama *Royalist* dengan muatan 142 tan dan dilengkapi dengan senjata. Kemudiannya beliau berlayar ke timur dan sampai ke Singapura pada tahun 1838 dan diminta oleh Gubernur George Borham untuk ke Kuching bagi menyampaikan ucapan terima kasih kepada Pangeran Muda Hasyim karena membantu kapal Inggeris yang terdampar di pantai Sarawak. Tujuan utama Brooke berlayar ke Timur karena untuk membuat penyiasatan saintifik. Beliau juga amat meminati Sir Stamford Raffles dan ia yakin pengunduran Syarikat Hindia Timur dari Jawa adalah satu kesilapan besar. James Brooke sampai ke Sarawak pada 15 Ogos 1839 dan berlabuh di Sungai Sarawak dan bertentangan dengan rumah Pangeran Muda Hasyim. Ini adalah pertemuan kali pertama James Brooke dengan Pangeran Muda Hasyim dan lalu memberikan hadiah dan surat ucapan terima kasih kepada Pangeran Muda Hasyim yang dikirim oleh Gubernur dan dewan perniagaan Singapura atas jasa baik beliau menolong kelasi-kelasi kapal Inggeris yang karam di perairan Sarawak. Mereka juga menjalinkan hubungan persahabatan sejak pertemuan pertama tersebut.

utusan kerajaan British menghantar hadiah kepada Pengeran Muda Hasyim yang telah berjasa menolong kapal kerajaan British yang karam di Kuala Sungai Sarawak.<sup>47</sup> Setahun kemudian, beliau datang sekali lagi ke Sarawak dan telah membuka ruang kepada Pangeran Muda Hasyim mengadakan pakatan dengan James Brooke bagi menentang Pangeran Indera Mahkota. James Brooke menetapkan syarat yang lumayan dan menguntungkan dirinya dalam misi menghalau Pangeran Indera Mahkota akhirnya berhasil dan diberi kuasa di kawasan-kawasan yang berhasil ditakluki bersama Pangeran Muda Hashim.

Setelah itu James Brooke mengatur strategi yang penuh dengan muslihat sehinggalah beliau menguasai sebahagian tanah Sarawak.<sup>48</sup>

Empayar Kesultanan Brunei yang luas akhirnya jatuh satu demi satu ke tangan James Brooke dan begitu juga kepada pengganti beliau yaitu Charles Anthony Brooke.<sup>49</sup>

---

<http://bizniz87.wordpress.com/2009/04/10/sejarah-sarawak/> , dicapai 10 Oktober 2012

<sup>47</sup> Azhar Bin Ahmad, "Masyarakat Bidayuh Di Bahagian Pertama Sarawak : Satu Kajian Mengenai Proses Pengislaman Dan Amalan Ajaran Islam Di Kalangan Mereka" (Latihan Ilmiah, Jabatan Usuluddin Dan Falsafah Fakulti Pengajian Islam Universiti Kebangsaan Malaysia, 1987/88), 15

<sup>48</sup> Putit Matzen, "*Perkembangan Islam di Sarawak Dan Majlis Islam Sarawak dalam Prosiding Nadwah Ulama Nusantara II Sumbangan Ulama dan Tokoh Agama Borneo*, Farid Mat Zain *et al* (eds.) (Bangi: Fakulti Pengajian Islam Universiti Kebangsaan Malaysia, 2003), 722

<sup>49</sup> Charles Brooke anak saudara kepada James Brooke dah memerintah Sarawak hamper 48 tahun. Beliau dilantik menjadi Raja Sarawak kedua pada 3 ogos 1868 dan mengangkat sumpah pada 11 oktober 1868. Beliau seorang yang pemurah tetapi berpendirian tegas. Charles juga dianggap seorang yang berfikiran terbuka, cergas dan menggunakan kewarasan politik dalam pentadbiran. Tugas utama Charles ialah untuk menyusun pentadbiran memastikan kerajaan tidak banyak berhutang seperti zaman bapa saudaranya. Beliau juga menjalankan dasar berjimat cermat dalam pemerintahannya.

Sarawak dibahagikan kepada tiga bahagian, setiap bahagian ditadbir oleh seorang Residen (Eropah) dengan dibantu oleh seorang Penolong Residen dan Pegawai Daerah. Bagi pentadbiran anak negeri, ketua-ketua tempatan orang Melayu, Cina dan Dayak terus dikekalkan. Ketua-ketua ini dilantik oleh Residen. Masalah-masalah dalam masyarakat akan dikendalikan oleh ketua masyarakat masing-masing. Kadang kala raja sendiri terpaksa campur tangan apabila masalah yang timbul melibatkan antara dua kaum atau lebih.

## B. Sarawak Pada Fasa Pra Merdeka

zaman pemerintahan James Brooke di Sarawak mengisi lipatan sejarah tersendiri Negeri Sarawak. Berbagai tulisan dan bingkisan sejarah telah terpahat tentang Bumi Kenyalang berkaitan Rajah Brooke dari kisah suka dan dukanya. James Brooke pernah menyatakan penduduk asli Pulau Borneo adalah bajak laut dan mengamalkan hidup bercorak kanibalisme. Namun, kenyataan Brooke ini perlu disempurnakan dan tidak dapat diterima sepenuhnya atau ditolak begitu saja karena memiliki dasar sejarah tersendiri.

Bagi penulis, melihat kenyataan Brooke di atas sudah tentu tidak boleh diterima bulat-bulat karena menyembunyi maksud sebenar yang tidak berhasil diungkap secara langsung oleh sejarah tetapi terdapat bukti-bukti lain menjelaskannya.

Menurut D.G.E Hall,<sup>50</sup> Pulau Borneo menjadi tanah rebutan kuasa-kuasa barat seperti China, Belanda, Portugis, Inggeris untuk tujuan monopoli hasil bumi yang banyak seperti rempah, permata, emas, damar, kayu-kayan dan

---

Charles Brooke juga membawa masuk mubaligh-mubaligh Kristian yang bermazhab Roman Katolik. tugas Mubaligh adalah untuk mengkristienkan penduduk tempatan terutamanya penduduk yang masih mengamalkan animisme. Selain itu beliau mewujudkan sekolah-sekolah dan beberapa kemudahan yang lain.

Dalam perkara ini, beliau memang bersikap sebagai seorang yang imperialis. Charles tidak begitu berminat untuk menambahkan kekayaan Negara tetapi beliau lebih cenderung untuk meluaskan jajahan Sarawak. Charles menjalankan dasar perluasan kuasa ke arah utara ini yaitu bermula sejak zaman Raja Putih Pertama lagi dan disambung oleh Charles Brooke. Beliau telah meminta Daerah Baram daripada Sultan Brunei pada awal tahun 1868, sebagai gantinya baginda akan mendapat bayaran yang sewajarnya setiap tahun. Selain itu, Charles juga merancang hendak menambah kawasan pantai Sarawak supaya menjadi serratus batu panjang – <http://bizniz87.wordpress.com/2009/04/10/sejarah-sarawak/>, dicapai pada 10 Oktober 2012

<sup>50</sup> D.G.E Hall merupakan seorang Profesor Emeritus bagi sejarah Asia Tenggara di University Of London.

sebagainya. Perkara ini menjadikan penduduk asal Borneo tertindas bahkan menjadi buruh paksa kepada penjajah berkenaan, manakala sebahagian yang lain lari mencari penempatan baru yang lebih selamat dari gangguan penjajah untuk dijadikan tempat tinggal. Dalam masa yang sama, tersemat dendam dan perasaan memberontak yang kuat dalam diri mereka terhadap penjajah. Oleh yang demikian mereka menyerang kapal-kapal penjajah yang berlayar melalui perkampungan mereka untuk mengambil kembali hak-hak mereka yang dirampas oleh penjajah. Perkara ini menjadi semakin popular di kalangan masyarakat asal Borneo sehingga banyak perkampungan mereka tersebar sepanjang tebingan sungai.<sup>51</sup>

Pada pandangan penulis, inilah yang sebenarnya yang tersirat disebalik kenyataan Brooke terhadap penduduk asal Borneo. Sikap penduduk tersebut bukanlah sikap asal mereka tetapi merupakan reaksi atau tindak balas dari penindasan para penjajah yang rakus tersebut. D.G.E Hall menyebut;

...Tidak dapat disangkal lagi bahawa peringkat genting dalam kurun kedelapan belas dan “kecelakaan dahsyat” pada kurun kesembilan belas terutama sekali akibat daripada keadaan kacau bilau dalam perniagaan bumiputera di Nusantara karena kesan pengaruh Portugis dan Belanda dalam kurun keenam belas dan tujuh belas. Dan jika dibandingkan dengan cara Portugis yang bersendirian memperkayakan diri mereka, maka cara Belanda membina monopoli peniagaannya dengan teratur serta dirancang dengan rapi adalah sebab yang tunggal bagi keruntuhan dan

---

<sup>51</sup> D.G.E Hall, *History Of South East Asia: Sejarah Asia Tenggara*, terj. Dewan Bahasa Dan Pustaka (Kuala Lumpur: Percetakan Dewan Bahasa Dan Pustaka, 1987, cet. Ke-8), 640-642



keadaan kacau-bilau dalam kerajaan tempatan. Maka inilah yang sesungguhnya yang menggalakkan lanun hingga tidak ada tolok bandingnya, apatah lagi bila merosotnya kuasa Syarikat Hindia Timur Belanda dalam abad kedelapan belas...<sup>52</sup>

Kedatangan James Brooke telah menyemai bibit persaingan terhadap perkembangan Islam yang sedang bertapak kukuh ketika itu dengan pengaruh-pengaruh Kristian. Keberadaan James Brooke di Sarawak telah membawa bersama kewujudan institusi-institusi ajaran Kristian dan kemudian ianya berkembang dengan pesat.<sup>53</sup>

Misi James Broooke bukan sekadar bersifat pribadi untuk tinggal di Sarawak tetapi merupakan misi ajaran Kristen yang dianutnya selama ini dan misi tersebut terlihat begitu jelas berdasarkan langkah-langkah yang diambil oleh beliau.

James Brooke berniat mendirikan misi 'Church of England' di bumi Sarawak dan hasilnya, dalam tahun 1847, Borneo Church Mission (BCM) telah didirikan. Tidak cukup dengan itu, ia berikutnya membawa para misionaris Kristen seperti Pendeta Francis McDougallserta pembantunya William Bodham Wright untuk menyebarkan ajaran Kristen di Sarawak. Pada zaman pemerintahan Brooke, Islam kurang mendapat perhatian, sehingga perkembangan Islam terganggu karena kendala dan hambatan dari James

---

<sup>52</sup> *Ibid.*, Hall, 650

<sup>53</sup> Mohammad Hasbie Sulaiman, *Perjuangan Anti-Cession Sarawak* (Kuching: Persatuan Kebangsaan Melayu Sarawak, 1989), 4

Brooke melainkan ajaran Kristen mendapat tempat istimewa dan berkembang dengan cepat hasil dari dorongan dan dukungan yang diberikan oleh Brooke kepada para misionaris Kristen.

Sungguhpun usaha dan rencana yang diatur oleh James Brooke untuk menghalang kerja mengembangkan agama Islam menggunakan berbagai cara dan menyeluruh, tetapi tidak mampu menyekat sepenuhnya perkembangan agama Islam yang dilakukan oleh ulama dan guru-guru agama atau golongan agamawan. Lebih-lebih lagi disebabkan Islam telah bertapak lebih dahulu dan kukuh sebelum kedatangan James Brooke ke Sarawak.<sup>54</sup>

Secara umum layanan Administrasi Brooke terlihat lebih cenderung membantu usaha misionaris Kristen dibandingkan umat Islam. Administrasi Brooke ada menyalurkan alokasi keuangan kepada badan Islam tetapi jumlah yang diberikan adalah sedikit. Ketentuan tersebut tidak cukup untuk digunakan bagi seluruh negeri Sarawak yang begitu luas. Begitu juga wewenang yang diberikan kepada badan itu juga terbatas. Dari segi jumlah staf yang bertugas juga adalah sedikit sehingga sulit untuk mengemban tanggung jawab yang banyak.

Seorang pegawai Brooke menyebut bahwa sebelum kedatangan Brooke ke Sarawak, Pendidikan Agama Islam memang sudah diajar dikalangan Orang Melayu. Mereka adalah kaum bumiputera terawal yang mempunyai system

---

<sup>54</sup> Putit Matzen, *“Perkembangan Islam di Sarawak Dan Majlis Islam Sarawak dalam Prosiding Nadwah Ulama Nusantara II Sumbangan Ulama dan Tokoh Agama Borneo*, Farid Mat Zain., 722

pendidikan yang dikendalikan di surau-surau atau di rumah-rumah Ketua Kampung dan dikelola oleh guru agama. Usaha tersebut telah memberi harapan kepada umat Islam apabila telah berhasil melahirkan tokoh-tokoh ulama seperti Datuk Hakim Abang Haji Abdul Rahman (1829-1890). Beliau banyak menyumbang kepada kerja-kerja dakwah di Sarawak.<sup>55</sup> Beliau juga dikenali dengan nama Datuk Hakim Keramat.

Secara umumnya bolehlah dikatakan bahwa usaha dan kesungguhan para ulama dan guru agama yang mengembangkan agama Islam di Sarawak tidak sia-sia, bahkan telah mencapai kejayaan. Kemudian usaha tersebut diteruskan oleh cerdik pandai yang datang kemudian seperti Syeikh Othman Bin Abdul Wahab, Datuk Patinggi Abang Haji Abdillah, Datuk Imam Morshidi (1877-1939),<sup>56</sup> Datuk Hakim Abang Haji Mohideen.<sup>57</sup> Datu Mufti Haji Abdul Kadir Hassan (1928-1988) melanjutkan usaha mereka.<sup>58</sup>

Pada 1 Mei 1955, Kerajaan Kolonial Inggeris telah menubuhkan Majlis

---

<sup>55</sup> Zulkiple Abdul Ghani et al., "Peranan Tokoh Agama dalam Mengorganisasikan Dakwah di Sarawak Sebelum Merdeka", dalam, *Prosiding Nadwah Ulama Nusantara II Sumbangan Ulama dan Tokoh Agama Borneo*, Farid Mat Zain et al (eds.) (Bangi: Fakulti Pengajian Islam Universiti Kebangsaan Malaysia, 2003), 644

<sup>56</sup> Merupakan salah seorang murid kepada Syeikh Othman bin Abdul Wahab dan juga berpeluang melanjutkan pelajaran ke Masjidil Haram di Mekah. Beliau bertanggungjawab mengubah kaedah pembelajaran daripada belajar di rumah-rumah guru berpindah ke bangunan sekolah. Beliau merupakan perintis sehingga tertubuhnya al-Madrasah al-Islamiah yang dulunya dikenali sebagai Al-Madrasatul Morshidiah. Dari sekolah tersebut lahir tokoh-tokoh seperti Datuk Mufti Negeri Sarawak, Datuk Haji Abdul Kadir bin Hasan, Ustaz Mohd. Mortadza Haji Daud, Ustaz Awang Sibon dan lain-lain lagi. Selanjutnya beliau merintis jalan yang akhirnya membawa kepada penubuhan majlis Islam Sarawak. Beliau mengajak tokoh-tokoh lain yang ada seperti Mufti Abang Haji Nawawi yang terkenal dalam bidang fekah, Al-Quran dan Tawarikh, Tuan Haji Baharuddin seorang ahli dalam bidang fekah, -Abang Haji Julaihi seorang ahli falaq dan Tuan Haji Salleh Arif yang menguasai ilmu Al-Quran, fekah dan umum. BINA, h. 103

<sup>57</sup> Merupakan seorang pendidik mengajar secara sambilan dan jugaseorang pegawai tetapi memiliki ilmu agama yang meluas sehingga dilantik menjadi Datuk Hakim-BINA, h. 104

<sup>58</sup> Abdul Kadir Hassan, [Pondokhabib.wordpress.com/2010/03/05/datuk-abdul-kadir-hassan](http://Pondokhabib.wordpress.com/2010/03/05/datuk-abdul-kadir-hassan) .dicapai 13September2011

Islam Sarawak (MIS) menggantikan sebuah badan yang ditubuhkan zaman pemerintahan keluarga Brooke yaitu Balai Datu (*Datu's Court*). Majlis Islam Sarawak (MIS) berperan dalam mentadbir dan mengurus masyarakat Islam termasuk dalam bidang pembangunan insan.

Penjajahan Brooke telah meninggalkan kesan yang mendalam terhadap umat Islam di Sarawak. Umat Islam ketika itu hanyut dalam perkara yang bertentangan dengan ajaran agama terutamanya di kalangan generasi muda. Ada dari kalangan mereka mempertikaikan kewujudan Allah SWT. Mereka juga memandang rendah terhadap Islam dan menyatakan bahwa agama Islam adalah ketinggalan dan tidak membawa kemajuan.<sup>59</sup>

Perkembangan Islam di Sarawak bertambah rancak dan meningkat terutamanya pada era seterusnya setelah merdeka membentuk Malaysia<sup>60</sup>.

### **C. Sarawak Pada Fasa Pasca Merdeka**

Sarawak merdeka bersama Pembentukan Malaysia pada 16 September 1963. Oleh itu sebuah badan pemerintahan negeri telah dibentuk bagi menjalankan tugas mentadbir dan membangun Negeri Sarawak. Berbagai pembangunan telah berlaku sama ada dari sudut infrastruktur, pembangunan bandar, pembangunan luar bandar, pembangunan ekonomi, pendidikan dan

---

<sup>59</sup> Jawatankuasa Penyelidikan Sejarah Penerbitan dan Penerangan Perayaan 10 Tahun Angkatan Nahdatul Islam Bersatu (B.I.N.A), *Sepuluh Tahun BINA 1969-1979*, 18

<sup>60</sup> Abdul Razak Abdul Kadir, "Sejarah Dan Perkembangan Majlis Islam Sarawak Dalam Pendidikan Dan Zakat (1955-1991)", (tesis kedoktoran, Jabatan Sejarah Dan Tamadun Islam, Akademi Pengajian Islam, Universiti Malaya, 2011), 30-40

termasuk pembangunan insan.

Sarawak telah mempunyai lima (5) orang Ketua Menteri yaitu yang pertama adalah Stephen Kalong Ningkan (1920-1997) dari tarikh 22 Juli 1963 hingga September 1966, yang kedua adalah Tawi Sli (lahir 1934) dari tahun 1966-1970, yang ketiga adalah Abdul Rahman bin Ya'kub (1928-2015) dari 1970-1981, yang keempat adalah Abdul Taib bin Mahmud dari tahun 1981 hingga 2014 dan yang kelima adalah Adenan bin Satem.

Kepimpinan Abdul Rahman bin Ya'kub sebagai Ketua Menteri Sarawak sangat mencolok berbanding dua ketua menteri sebelum beliau. Tokoh ini berhasil membawa keamanan, perpaduan masyarakat, pembangunan dan kemajuan fizikal Negeri Sarawak sebagaimana telah dibincangkan pada bab yang ketiga kajian ini. Tokoh ini mendapati umat Islam menerima pembangunan fizikal yang dibawa dengan baik tetapi beliau bimbang apabila melihat keadaan umat Islam yang masih ketinggalan dan rendah kesedaran agama mereka.

Umat Islam ketika itu kurang mengindahkan tanggungjawab agama dan terdapat di kalangan pegawai-pegawai kerajaan yang mengamalkan kehidupan ala Barat dengan pesta-pesta dansa, minum arak secara terbuka, berfoya-foya dan pergaulan bebas.<sup>61</sup>

Lantaran itu, tokoh ini telah berusaha membawa pembangunan insan

---

<sup>61</sup> Abdul Rahman Fadzail (Temenggong dan Pengerusi HIKMAH Miri), dalam temubual dengan penulis pada 14 Mei 2015

kepada penduduk Sarawak terutama di kalangan umat Islam yang telah berubah jati diri mereka menjadi pemuja Barat. Untuk tujuan itu, tokoh ini telah melakukan berbagai upaya dan langkah untuk mencapai tujuan pembangunan insan tersebut. Di antara langkah yang diambil oleh tokoh ini, yang terpenting adalah mendirikan organisasi dakwah yaitu BINA. Tujuan tokoh ini dibalik berdirinya organisasi tersebut adalah sebagai medium untuk membawa perubahan yang drastic, komprehensif dan luas terhadap umat Islam.

#### **D. Organisasi Dakwah**

Sebagaimana telah disebut sebelum ini organisasi adalah susunan personel dalam sebuah struktur yang rapi dengan pembahagian peranan dan tugas untuk mencapai tujuan yang telah dirancang sebelumnya. Pendekatan organisasi ini sangat membantu tercapainya tujuan dakwah yang besar dan dapat meringankan beban yang berat melalui pembahagian tugas dan peranan kepada personal-personal yang terlibat. Pendekatan secara organisasi juga mampu mengelak daripada tersasar daripada tujuan asal karena wujudnya perancangan rapi dan pemantauan aktif pada pelaksanaannya.

Penulis yakin bahwa kerja dakwah adalah kerja secara organisasi atau berjemaah berasaskan hujah-hujah berikut;

1. Berdasarkan ayat-ayat al-Qur'an:-
  - a. Surah Ali Imran (3) ayat 104 :

“Hendaklah ada dari kalangan kamu satu umat yang menyeru kepada ma’ruf dan mencegah dari yang mungkar, mereka itulah golongan yang berhasil”. Dalam ayat ini Allah menyebut perlunya golongan atau sekelompok manusia yang menggerakkan kerja menyeru kepada yang Ma’ruf dan mencegah dari perbuatan mungkar yaitu dakwah.

b. Ali ‘Imran (3) ayat 110:

“Kamu adalah sebaik-baik umat yang dikeluarkan untuk manusia, kamu menyeru kepada yang ma’ruf dan mencegah dari yang munkar dan kamu beriman kepada Allah...”. Dalam ayat tersebut Allah juga menggunakan kalimat ‘kamu’ yaitu segolongan dari kamu juga bermaksud kolektif.

2. Terdapat juga hadith menyebut mengenai dakwah atau seruan kepada Islam dalam bentuk kolektif seperti;

a. Hadits nabi

“Sampaikanlah dariku walaupun sebaris ayat. (HR. Bukhari)”.  
Kalimat “sampaikanlah” dalam hadith ini adalah dalam format jama’.

b. Sabda nabi lagi:

“Barangsiapa diantara kamu yang melihat kemungkaran hendaklah mengubahnya dengan tangan. (HR. Muslim)”.

Kalimat “mengubahnya” adalah dalam bentuk kolektif.

Ayat-ayat dan hadits di atas menunjukkan bahwa kerja dakwah dilakukan secara berkelompok berdasarkan format kata kerja yang digunakan adalah format *jama'* yang membawa maksud berjemaah atau secara berorganisasi. Himpunan ayat-ayat dan hadits ini memperkuat bahwa kerja dakwah sebenar-benarnya adalah kerja berorganisasi bukan individu. Terdapat ayat ayat menyebut tentang dakwah dalam bentuk *mufrad* atau format seorang seperti al-Nahl 125 yang bermaksud : “...Serulah kepada jalan Tuhanmu dengan *hikmah* dan *mau 'izatul hasanah* dan berdialoglah dengan mereka dengan baik...”. Kalimat “serulah” dalam ayat ini berbentuk mufrad tetapi ayat ini berbicara tentang metode dakwah bukannya dakwah setepatnya. Ayat-ayat tersebut bukannya bertentangan tetapi memperkatakan dua perkara yang berbeda yaitu dakwah yang hakiki dan metode dakwah. Maka, dakwah secara prinsipnya adalah kerja secara organisasi tetapi tidak dilarang melakukannya secara individu atau dikenali dengan istilah *da'wah fardhiah*.<sup>62</sup>

Oleh yang demikian, langkah tokoh ini menubuh organisasi dakwah ialah langkah yang bijak dan berporos desain bentuk dakwah seperti dinukilkan dari ayat dan hadits di atas. Dari satu sudut yang lain menampakkan tokoh ini mempunyai idea dan buah fikiran yang ke depan dan kreatif dalam

---

<sup>62</sup> Istilah *da'wah fardhiah* digunakan oleh ustaz Mustafa Masyhur dalam bukunya dengan tajuk *Dakwah Fardhiah* yang membawa makna kerja dakwah yang dilakukan oleh seseorang kepada sasaran dakwahnya. Menurut beliau *da'wah fardhiah* ini tidaklah bermakna pendakwah tersebut tidak bergabung dengan organisasi dakwah tetapi dimaksudkan lebih kepada usahanya secara sendirian dalam meyakinkan sasaran dakwah beliau.



berdakwah.

Adalah penting bagi pendakwah dan mereka yang terlibat dalam dakwah memiliki pemikiran yang kreatif kerana Allah SWT menggariskan prinsip-prinsip dakwah sambil pelaksanaannya pula memerlukan penggunaan akal pemikiran kerana akan mengkaji tindakan-tindakan hakiki atau alternative yang digunakan untuk mencapai tujuan dakwah.<sup>63</sup>

Sekiranya dibuat pengukuran atau perbandingan terhadap kekuatan dakwah secara individu dengan dakwah secara kolektif yaitu melalui organisasi akan nampak jurang yang amat besar dalam keberangkalian untuk mencapai tujuan dakwah.

Pelaksanaan dakwah secara organisasi berpeluang memberi impak yang jauh lebih besar daripada pelaksanaan secara individu. Tokoh ini telah merombak dan yakin dalam langkah beliau menginstitusikan dakwah dengan menubuhkan organisasi dakwah.

Gerakan pengembangan ajaran Islam yang dilakukan oleh kalangan agamawan sebelum tokoh ini sememangnya memberi kesan yang baik tetapi pada skala yang sederhana dan kurang mampu menghadapi tantangan. Gerakan tersebut lebih tertumpu pada perayaan-perayaan kebesaran Islam tanpa penekanan kepada aspek pembangunan insan.

Terdapat empat elemen utama bagi sebuah organisasi yaitu perancangan, pendelegasian tugas, pemimpin dan kepimpinan dan pengawalan dan

---

<sup>63</sup> Rozhan Othman, *Pengurusan Dakwah*, (Bangi Selangor Darus Ehsan: Ummah Media Sdn. Bhd., 1990), 69

elemen-elemen ini memerlukan tenaga yang banyak untuk memastikan ia berkesan dan berjalan menuju tujuan organisasi.<sup>64</sup> Sebagai analogi melihat kepada susunan barisan cabinet negara yang memiliki ketua sebagai pimpinan tertinggi kemudian Jemaah menteri sebagai yang dipimpin mengurus hal ehwal kewangan, industry, pelancongan, ekonomi, pendidikan, keselamatan dalam negara, menteri luar negara, pertahanan, pertanian, pemantauan, pengauditan, kebajikan dan pembangunan masyarakat serta berbagai lagi jabatan atau kementerian. Tugas-tugas di atas adalah berat dan mustahil mampu dilakukan secara individu dan akan berlaku kekusutan serta keadaan tidak terurus pada negara bahkan boleh menyebabkan huru hara.

Daripada perbincangan di atas, menampakkan rasional yang tinggi terhadap langkah tokoh ini menubuh organisasi dakwah. Langkah ini telah berkesan dalam mengembalikan jati diri umat Islam yang telah tercemar dan kemudian tokoh ini menjelajahi dan memperkenalkan dakwah kepada golongan non-Muslim. Organisasi yang dimaksudkan adalah BINA dan akan menelusuri sejarah ringkas penubuhannya. Apakah yang menjadi asas penubuhan organisasi ini dan apakah perannya dalam menggerakkan dakwah di bumi Sarawak.

## **E. Sejarah Penubuhan BINA**

---

<sup>64</sup> Juanda Jaya, *Dakwah Islamiah Di Sarawak: Kajian Terhadap Pengurusan Dakwah Secara Organisasi*, (Bangi: Tesis Kedoktoran, Fakulti Pengajian Islam Universiti Kebangsaan Malaysia, 2003), 196-197

Tokoh ini mengetuai penubuhan organisasi yang dikenali dengan nama BINA pada tahun 1969. BINA adalah Angkatan Nahdatul Islam Bersatu yang dibaca terbalik setiap huruf pertama pangkal perkataannya membentuk perkataan BINA.<sup>65</sup>

Fakta menyebut bahwa pertubuhan BINA adalah hasil dari usul yang timbul daripada sebuah congress yang diadakan pada tahun 1968 yaitu Kongress Islam Malaysia Timor (Timur) di Kuching. Berdasarkan pengamatan penulis berkaitan usul-usul atau resolusi yang terhasil dari kongress tersebut tidaklah secara langsung menyentuh berdirinya BINA. Terdapat sebuah usul yang paling hampir yaitu keputusan yang telah diluluskan, keputusan nomor tiga dari pembentangan kertas kerja oleh Encik Abdul Taib Mahmud yang bertajuk Kedudukan “Orang-Orang Islam Di Malaysia Timur”.<sup>66</sup> Keputusan tersebut adalah seperti berikut;

... Kongress berpendapat bahwa masanya sudah tiba bagi orang-orang Islam memikirkan cara-cara hendak melancarkan pekerjaan mubaligh (missionary work). Sebagai langkah yang pertama ialah diadakan rayuan kepada negara-negara Islam yang kaya dan kepada umat Islam di Malaysia supaya mengadakan satu tabung untuk membiayai perancangan tersebut...

Pada analisa penulis, istilah missionary work dalam keputusan diatas sememangnya menggambarkan BINA. Berdasarkan dari gerak kerja dan

---

<sup>65</sup> Ucapan Abdul Rahman Ya'kub Sempena 10 Tahun BINA, FNM, 1979, video

<sup>66</sup> Jawatankuasa Penyelidikan Sejarah Penerbitan dan Penerangan Perayaan 10 Tahun Angkatan Nahdatul Islam Bersatu (B.I.N.A), *Sepuluh Tahun BINA 1969-1979*, 95-102

tujuan-tujuan penubuhan BINA. Berdasarkan dari gerak kerja dan tujuan-tujuan penubuhan BINA, ia adalah sebuah gerakan *missionary*. Oleh itu penulis yakin keputusan di atas menjadi asas yang paling hampir kepada penubuhan BINA pada tahun 1968. Dan juga adanya bantuan daripada Negara Timur Tengah seperti Arab Saudi, Iraq, Libya, Qatar dan juga dari Indonesia diperolehi bagi membiayai dakwah BINA yang disebut dalam keputusan di atas.

Dalam ucapan sempena 10 Tahun BINA, tokoh ini ada menyebut terdapat desakan dari kalangan belia agar ditubuhkan sebuah pertubuhan sebagai medium yang menghimpunkan umat Islam terutamanya golongan muda.<sup>67</sup> Sebelum itu para belia tersebut telah mengikuti kursus agama yang dianjurkan oleh Persatuan Kebajikan Islam Sarawak (PERKIS) yang dipengerusikan oleh Encik Abdul Taib Mahmud.

Penulis selanjutnya juga akan menyentuh serba sedikit perkara yang berlaku di dalam kongress tersebut dari segi latar belakang, para pembentang kertas kerja dan tajuk-tajuk pembentangan seperti berikut

1. Abdul Rahman bin ya'kubm Yang Dipertua BINA.
2. Abdul Taib Mahmud (Datuk Amar) ketika itu Menteri Pertahanan Malaysia membentangkan tajuk Kedudukan Orang Islam Di Malaysia Timur.

---

<sup>67</sup> Jawatankuasa Penyelidikan Sejarah Penerbitan dan Penerangan Perayaan 10 Tahun Angkatan Nahdatul Islam Bersatu (B.I.N.A), *Sepuluh Tahun BINA 1969-1979.*, video

3. Abang Yusuf Puteh (Datuk) ketika itu adalah Timbalan Yang Dipertua BINA dan Setiausaha Kerajaan Negeri Sarawak membentangkan tajuk Kematian Orang Melayu Dan Kesannya Terhadap Ekonomi.
4. Abdul Kadir Hassan (Datuk) ketika itu Timbalan Yang Dipertua BINA dan Mufti Negeri Sarawak membentangkan tajuk Zakat Dan Fitrah Dan Kegunaannya.
5. Jemuri Serjan (Datuk) yang ketika itu adalah Peguam Negeri bagi Negeri Sarawak membentangkan tajuk Pelajaran Di Kalangan Orang-Orang Islam.
6. Bujang Nor (TanSri) yang ketika itu Setiausaha Kewangan Kerajaan Negeri Sarawak membentangkan tajuk Islam dan Ekonomi.<sup>68</sup>

Secara ringkas disebutkan di sini bahwa kepentingan kongres diadakan adalah sebagai langkah untuk mencetuskan kesedaran di kalangan umat Islam daripada kelalaian serta kealpaan mereka. Selain itu juga adalah untuk mengembalikan umat Islam pada landasan yang asal karena gejala budaya liar yang telah dibawa oleh penjajah tersebar secara meluas dan berpijak kuat di tengah umat Islam. Budaya ini semakin menjadi *trend* terutama dikalangan anak muda Islam sehingga sukar membedakan mereka dengan anak muda bukan Islam dari segi pergaulan bebas antara lelaki dan perempuan, budaya

---

<sup>68</sup> Jawatankuasa Penyelidikan Sejarah Penerbitan dan Penerangan Perayaan 10 Tahun Angkatan Nahdatul Islam Bersatu (B.I.N.A), *Sepuluh Tahun BINA 1969-1979*, 90

pesta pora, minum arak, berpakaian yang mendedah aurat serta berbagai lagi masalah yang lain.<sup>69</sup>

Oleh yang demikian, penubuhan BINA ketika itu sangat penting dan tepat pada waktunya bagi menangani gejala yang tidak sehat itu daripada berterusan. Disamping itu, kewibawaan dan kepimpinan tokoh ini dalam mengemudi BINA benar-benar menyentap lamunan umat Islam yang mabuk dengan Budaya Barat. Tokoh ini mampu menyedarkan mereka daripada mimpi dan angan-angan kosong dan kemudian membawa mereka bangkit untuk memartabatkan dakwah Islam di Sarawak.

Setelah itu BINA mulai aktif masuk ke tengah masyarakat Islam dengan membawa pesan dakwah dan juga kepada golongan non-Muslim sebagai usaha mengajak mereka masuk Islam.<sup>70</sup> Berbagai program dan aktiviti telah dicanang untuk tujuan tersebut kemudian dilaksanakan dengan sebaik-baiknya. BINA menjadi jentera dakwah yang aktif bergerak di Sarawak kepada semua lapisan masyarakat.<sup>71</sup>

Selanjutnya catatan sejarah kepimpinan BINA merekam barisan Presiden atau Yang Dipertua yang berkebolehan seperti berikut:

1. Abdul Rahman bin Ya'kub menjadi Presiden BINA daru tahun 1969 hingga 1988

---

<sup>69</sup> *Ibid.*, 70

<sup>70</sup> Afida Helmi, "Metode Dakwah Di Kalangan Masyarakat Dayak : Satu Kajian Di Bahagian Pertama", (Latihan Ilmiah Fakulti Usuluddin, Akademi Islam Universiti Malaya, 1991), 77

<sup>71</sup> Fathi Duet (Setiasaha Agung Ke-2 BINA) dalam temubual dengan penulis pada 24 April 2015

2. Mohd. Mortadza bin Haji Daud (Datuk) menjadi Yang Dipertua BINA dari tahun 1999 hingga 1993
3. Bujang bin Mohd. Nor (Tan Sri) menjadi Yang Dipertua BINA/HIKMAH dari tahun 1993 hingga 2005; dan
4. Abdul Aziz bin Dato Haji Husain (Tan Sri) menjadi Yang Dipertua HIKMAH dari tahun 2005 hingga sekarang.

Sejarah BINA terus berkembang dan bercambah sehingga sekarang. Penulis merasakan perlunya menyebut perubahan nama BINA kepada HIKMAH karena BINA sekarang adalah HIKMAH dan generasi baru tidak lagi menyebut nama BINA bahkan mereka tidak mengetahui maklumat tentang BINA.

Pertukaran nama BINA kepada HIKMAH telah disempurnakan melalui Perhimpunan Perwakilan BINA pada tahun 1994. Perubahan nama tersebut memberi imej dan semangat baru kepada BINA bergerak di zaman moden ini dengan nama HIKMAH. HIKMAH terdiri daripada HIKMAH Bahagian yaitu Bahagian Kuching, Bahagian Samarahan, Bahagian Sri Aman, Bahagian Betong, Bahagian Sarikei, Bahagian Sibu, Bahagian Mukah, Bahagian Bintulu, Bahagian Miri dan Bahagian Limbang. Setiap bahagian mengandungi cawangan masing-masing mengikut saiz bahagian. Terdapat bahagian yang mengandungi dua cawangan, seperti Bahagian Bintulu yaitu HIKMAH Cawangan Bintulu dan Cawangan Kuala Tatau. Rombakan telah

berlaku di dalam HIKMAH menjadikan semua HIKMAH Bahagian telah ditukar statusnya menjadi HIKMAH Ranting dengan mengekalkan ahli komite yang telah terpilih. Manakala operasi pentadbiran HIKMAH dilaksanakan oleh Ibu Pejabat HIKMAH diketuai oleh Ketua Pegawai Eksekutif (KPE) dan barisan pengurus serta kakitangan yang ada.<sup>72</sup>

Daripada sejarah penubuhan BINA di atas, penulis menyatakan bahwa tokoh ini telah mengubah dimensi dan gerakan dakwah daripada gerakan individu kepada gerakan berorganisasi berpaksikan kepada ajaran Islam. Lantaran itu, tokoh ini telah melakukan anjakan yang besar kepada gerakan dakwah sekaligus membawa kepada kejayaan yang berskala besar dalam dakwah di Sarawak.

#### **F. Lonjakan Aktiviti Dakwah**

Tokoh ini melakukan lonjakan aktiviti dakwah dan secara tidak langsung memperbaiki serta memperkasakan gerakan dakwah ketika itu. Sebagaimana telah disebutkan sebelum ini bahwa gerakan pengembangan agama Islam sebelum itu lebih berpaksi kepada sumbangan dan dedikasi para agamawan. Ianya berpencar-pencar ke serata tempat tanpa kordinasi atau dipusatkan secara kemas dan bersepadu. Oleh yang demikian kerja ini kurang mampu merekam pencapaian yang besar dalam dakwah Sarawak ketika itu.

---

<sup>72</sup> Hamisah Bohari, (Pegawai Sumber Manusia Ibu Pejabat HIKMAH) dalam temubual dengan penulis pada 5 Jun 2014



Keadaan ini berubah apabila tokoh ini melibatkan diri dalam gerakan dakwah dan memberi sumbangan yang sangat ketara. Berikut dipaparkan aktiviti-aktiviti dakwah yang diambil oleh tokoh ini.

#### 1. Surau Setia

Aktiviti yang pertama dipaparkan adalah Surau Setia yaitu sebuah program yang diilhamkan oleh tokoh ini bagi mendekati para pegawai kerajaan yang beragama Islam. Pelaksanaan program ini adalah dengan frekuensi seminggu sekali di tempat yang berbeda mengikut kesesuaian yang ada dan program ini dikendali oleh Setiausaha Kerajaan Negeri Sarawak. Pengisian program ini oleh mufti Negeri Sarawak dan tokoh ini pernah menyampaikan ceramah dalam program ini. Objektif program ini adalah untuk melibatkan para pegawai kerajaan dengan program agama karena ada dari kalangan pegawai-pegawai ini memiliki gaya hidup yang bercanggah dengan ajaran Islam.<sup>73</sup> Alangkah bahayanya sekiranya para pegawai kerajaan ini dibiarkan dalam keadaan yang penuh dengan mungkar karena di tangan mereka letaknya keputusan-keputusan penting dalam pentadbiran bahagian atau daerah di Sarawak karena mereka bertugas di berbagai tempat seluruh Sarawak. Program ini telah menyadarkan para pegawai ini akan tanggungjawab mereka sebagai seorang Muslim dan menjadikan mereka lebih berjiwa Islam.

---

<sup>73</sup> Abdul Rahman Fadzail, mantan Naib Presiden BINA, dalam temubual dengan penulis pada 14 Mei 2015

## 2. Darul Rahmah Pusat Latihan Dakwah BINA

Tokoh ini memandang serius aspek pendidikan terutamanya dari kalangan saudara kita. Oleh itu sebuah pusat pendidikan golongan ini ditubuhkan pada tahun 1977 bertempat di Jalan Haji Bolhasan Kuching. Pusat ini dinamakan Darul Rahmah Pusat Latihan Dakwah BINA menganjur kelas Fardhu Ain kepada mereka yang baru memeluk Islam.<sup>74</sup> Dengan adanya pendidikan serta bimbingan yang baik kepada golongan ini akan membantu mereka mengamalkan Islam dalam hidup mereka. Bagi menampung keperluan golongan ini di kampung, beberapa orang guru akan dihantar ke kampung Saudara Kita di pedalaman untuk mengajar mereka solat dan mengaji. Tokoh ini sendiri pergi ke pedalaman untuk memberi nasihat, mendidik dan mengajar Saudara Kita pengetahuan asas agama Islam.<sup>75</sup> Dengan aktiviti ini, keIslaman Saudara Kita lebih baik dan semakin kukuh serta sukar untuk dipengaruhi oleh saudara mara mereka yang tidak Islam.<sup>76</sup>

Pusat ini seterusnya menjadi asas penubuhan Institut Dakwah BINA (IDB) di tapak yang baru Batu 24 Jalan Kuching / Serian Lama, Padawan bagi menyediakan medium kepada belia-belia Saudara Kita untuk menuntut ilmu agama secara formal. Di antara objektif utama IDB adalah

---

<sup>74</sup> *Ibid.* 10

<sup>75</sup> Mohammad Sayed, (perintis dan mantan Penghulu Kampung Darul Islam Belimbing Padawan) dalam temubual dengan penulis pada 1 Mei 2014

<sup>76</sup> Jawatankuasa Penyelidikan Sejarah Penerbitan dan Penerangan Perayaan 10 Tahun Angkatan Nahdatul Islam Bersatu (B.I.N.A), *Sepuluh Tahun BINA 1969-1979*, 48-49

mempersiapkan belia-belua Saudara Kita untuk menjadi pendawah pada masa akan datang. Selepas berlaku perubahan, institute ini telah diserahkan kepada pihak Lembaga Kebajikan Darul Falah kemudian bertukar menjadi Institut Dakwah Darul Falah (IDDF).<sup>77</sup> Institut ini giat mengambil penuntut dari berbagai etnik dan kaum dari seluruh Negeri Sarawak.

### 3. Foster Home

Tokoh ini melebarkan kerjasama PERKIM Damansara Utama mengendalikan program yang dinamakan *Foster Home*. Program ini adalah penyediaan tempat bagi anak-anak mualaf dan non-Muslim dari Sarawak bermastautin di Semenanjung Malaysia. Tempat tinggal anak-anak ini disediakan, begitu juga dengan persekolahan mereka, makan minum, perbelanjaan dan aktiviti mereka dijaga dengan baik. Persekolahan mereka dipantau dan diurus dari peringkat sekolah rendah hinggalah ke Institut Pengajian Tinggi (IPT). Program ini masih berterusan hingga sekarang dan telah menyaksikan kejayaan anak-anak mualaf ini dalam bidang pelajaran bahkan ada yang telah memasuki alam pekerjaan. Anak-anak dari suku Iban, Bidayuh, Penan yang belum Islam akhirnya tertarik dengan agama Islam dan akhirnya menjadi Muslim

---

<sup>77</sup> Aturcara Majlis Pelancaran 40 Tahun BINA-HIKMAH 23 Jun 2009, 10

karena sekian lama bergaul dengan rakan-rakan mereka yang telah Islam. Di samping layanan yang baik dari penjaga-penjaga mereka juga memberi kesan yang positif kepada mereka.<sup>78</sup> Sebagai mantan Menteri Pelajaran Malaysia, tokoh ini melihat betapa pentingnya anak-anak ini diberikan peluang mengecapi pendidikan yang sempurna dan kehidupan yang nyaman bagi menempuh hari mendatang yang penuh dengan cabaran terutamanya sebagai Saudara Kita.

#### 4. TK BINA

Tokoh ini menekankan pendidikan Islam awal kepada kanak-kanak Islam dengan menubuhkan tadika ini. Tadika ini menjadi tadika Islam yang pertama di Bandar Kuching dan menjadi pusat yang penting mengasuh kanak-kanak ini dengan amalan serta ilmu Islam. Tokoh ini melihat kepentingan untuk mencorak tunas-tunas muda Islam dengan nilai-nilai mulia dan akhlak yang tinggi bersumberkan Islam, diasuh dan dididik cara berwudhu, solat, doa harian dan mengaji al-Qur'an.<sup>79</sup>

#### 5. Klinik Bergerak

Tokoh ini berpandangan jauh dan menyeluruh bukan sahaja menyediakan program-program agama secara langsung tetapi juga

<sup>78</sup> Aturcara Majlis Pelancaran 40 Tahun BINA-HIKMAH 23 Jun 2009 , 11

<sup>79</sup> Jawatankuasa Penyelidikan Sejarah Penerbitan dan Penerangan Perayaan 10 Tahun Angkatan Nahdatul Islam Bersatu (B.I.N.A), *Sepuluh Tahun BINA 1969-1979*, 62-63

mementingkan aspek kebajikan dan kesehatan. Oleh itu, tokoh ini mengarahkan pihak BINA mengadakan klinik bergerak di kawasan pedalaman. Klinik ini bukan sahaja memberi khidmat kesehatan kepada muafak di pedalaman, malah juga membina hubungan yang mesra dengan golongan non-Muslim yang ada di tempat berkenaan. Melalui klinik bergerak ini, petugas diterima baik oleh penduduk setempat tanpa merasa sebenarnya mereka telah dilibatkan dalam gerakan dakwah. Mereka juga tidak ada prasangka jahat terhadap klinik ini kerana telah mesra dengan petugasnya.<sup>80</sup>

#### 6. Ziarah Pedalaman

Dalam skala yang lebih besar, tokoh ini memelopori ziarah-ziarah ke kawasan pedalaman terutamanya ke kawasan golongan non-Muslim. Program Ziarah atau dalam Bahasa Sarawak dikenali sebagai '*berambeh*' yang merapatkan jurang dengan masyarakat pedalaman. Program ini adalah aktiviti santai dengan mengadakan majlis makan bersama masyarakat. Sebelum itu rombongan dari penggerak pendakwah dan masyarakat setempat akan mengadakan aktiviti memasak secara bersama-sama. Bahan makanan dibawa dari luar bagi memastikan kebersihan dan status halal makanan. status program adalah mesra

---

<sup>80</sup> Rosman Majid (1985), *Koleksi Temuramah Tokoh-Tokoh* (cet. Pertama, Kuala Lumpur: Utusan Publication & Distributors SDN. BHD, 1985), 2

diselingi dengan percakapan ringan mengenai perihal kampung, kebun, tanah, budaya, kemasyarakatan, pendidikan dan agama tanpa memberi tekanan kepada masyarakat kampung untuk memeluk Islam. Di antara objektif program adalah mewujudkan rasa nyaman dan yakin masyarakat kampung serta bersikap lebih terbuka untuk membincangkan tentang agama Islam dan seterusnya ditawarkan untuk memeluk agama Islam.<sup>81</sup>

#### 7. Perkampungan Baru Islam (PBI)

Tokoh ini memahami keadaan Saudara Kita yang masih belum kuat pegangan agama mereka dan adanya persuasi dari kerabat mereka yang belum Islam untuk kembali kepada agama lama mereka. Oleh itu tokoh ini membina keadaan yang lebih nyaman untuk Saudara Kita menjalani kehidupan sebagai Muslim dengan membina perkampungan baru untuk mereka. Program ini diberi nama Perkampungan Baru Islam (PBI). Walaupun mereka tinggal di perkampungan baru, mereka mengekalkan hubungan kekeluargaan dengan saudara mara mereka yang non-muslim.<sup>82</sup>

Sebagai contoh ialah Kampung Darul Islam Belimbing Padawan. Kampung ini telah mula diteroka pada tahun 1970. Pada tahun 1973 umat Islam dari kalangan Saudara Kita mula mendirikan rumah di kampung ini.

---

<sup>81</sup> Jawatankuasa Penyelidikan Sejarah Penerbitan dan Penerangan Perayaan 10 Tahun Angkatan Nahdatul Islam Bersatu (B.I.N.A), *Sepuluh Tahun BINA 1969-1979*, 39

<sup>82</sup> *Ibid.*, 40

Kampung ini merupakan tanah yang telah diluluskan oleh kerajaan yang dipimpin oleh tokoh ini bagi penempatan baru dan pada tahun 1979. Kampung ini telah dirasmikan dengan nama Kampung Darul Islam Belimbing oleh tokoh ini yang ketika itu menjawat Ketua Menteri Sarawak.<sup>83</sup>

#### 8. Anugerah Ibadah Haji

Tokoh ini amat peka terhadap pengaruh ketua-ketua mualaf yang telah berkorban meninggalkan agama nenek moyang mereka dan memeluk Islam sebagai pegangan agama yang baru. Bagi memperkukuh keimanan mereka dan memberi imbuhan kepada mereka, sebahagian daripada ketua ini diberi anugerah menunaikan ibadah haji secara percuma. Mereka akan berangkat ke Mekah secara bergilir-gilir berdasarkan kuota yang disediakan. Pengalaman mereka menunaikan Haji dan imbuhan tersebut akan dikongsikan kepada anak buah mereka di rumah panjang dan dengan ini telah menaikkan kedudukan mereka. Tokoh ini mengarahkan BINA untuk mengurus beberapa orang Ketua kaum dari kalangan Saudara Kita untuk menunaikan haji ke Mekah. Kos dan perbelanjaan ditanggung oleh BINA.

---

<sup>83</sup> Mohammad Sayed, (perintis dan mantan Penghulu Kampung Darul Islam Belimbing Padawan) dalam temubual dengan penulis pada 1 Mei 2014

## 9. Ekonomi

Tokoh ini juga menyediakan landasan yang baik untuk umat Islam dan mualaf berkecimpung dalam sektor ekonomi. Sebuah koperasi Islam telah didirikan yaitu Koperasi ANIB pada tarikh 15 Disember 1978. Tujuan penubuhan koperasi ini adalah untuk menggalakkan umat Islam menceburi bidang ekonomi seperti dalam sector pertanian, perladangan kelapa sawit, koko, getah bahkan bidang pelaburan dan hartanah. Tokoh ini juga mengikat bekerjasama dengan Majlis Amanah Rakyat (MARA) menyediakan premis-premis perniagaan di tengah-tengah Bandar Kuching bagi menggalakkan umat Islam menjalankan perniagaan runcit.

Pada tahun 1988, tokoh ini berhenti daripada memimpin BINA dan hadirnya pimpinan baru untuk meneraju BINA. Seterusnya pada tahun 1994 berlaku perubahan besar kepada nama BINA apabila ditukar menjadi Harakah Islamiah yang dipendekkan menjadi HIKMAH. Gerakan dakwah yang dirintis oleh tokoh ini diteruskan dengan imej baru ini bahkan dikuasakan dengan bentuk-bentuk moden.

Beberapa aktiviti HIKMAH yang dinyatakan disini seperti Kursus Intensif Islami (INTI), Kelab Remaja Hikmah (KRH), Hal Ehwal Wanita (HELWA), Konvoi Belia, Safari dan pengagihan Bantuan Raya /



Ramadhan, Sembelihan dan Pengagihan Daging Kurban, Pusat Latihan Dakwah Lelaki dan Wanita, Tarbiah HIKMAH dan berbagai lagi program bertujuan menyemarakkan gerakan dakwah.

Gerakan dakwah yang besar ini mampu dilaksanakan dengan baik dan tokoh ini sentiasa hadir memberi khidmat dan dedikasi bagi memastikan ianya berjalan. Disamping itu gerakan ini melibatkan banyak pihak dan individu.

#### **G. Pengakuan Terhadap Abdul Rahman Ya'kub**

Penulis telah mengadakan wawancara dengan beberapa individu dalam mendapatkan maklumat dan fakta yang belum diterbitkan mengenai sumbangan tokoh ini dalam dakwah di Sarawak. Selanjutnya penulis paparkan hasil wawancara yang telah dibuat.

##### **1. Fathi Duet**

Beliau merupakan Setiausaha Agung BINA dari tahun 1970 hingga 1980. Beliau juga merupakan Setiausaha Zakat dan Fitrah majlis Islam Sarawak (MIS) sebelum penubuhan BINA. Beliau terlibat dalam penubuhan BINA dari peringkat awal lagi bersama dengan tokoh ini. Dalam wawancara dengan penulis beliau berkongsi pengalaman dan pandangan yang berkaitan dengan sumbangan dakwah tokoh ini dan BINA.

Menurut beliau latar belakang penubuhan BINA adalah hasil dari Kongres Islam Malaysia Timur pada tahun 1968. Pada ketika itu belia-belia Islam telah jauh dari ajaran agama dari segi pegangan hidup serta tingkah laku mereka. Oleh itu tokoh-tokoh masyarakat ketika itu menubuhkan sebuah organisasi yang disebut BINA untuk menangani gejala tersebut.

Menurut beliau lagi tokoh ini menjadikan dakwah sebagai projek yang penting di Sarawak. Dakwah beliau mencakup berbagai lapisan masyarakat sama ada belia, dewasa lelaki dan perempuan dengan pelaksanaan dua bentuk operasi dakwah yaitu dakwah ke dalam dan dakwah ke luar. Dakwah ke dalam adalah untuk memperbaiki keadaan umat Islam yang sedia ada ke arah menjadi umat Islam yang berpegang teguh kepada ajaran Islam. Manakala dakwah ke luar pula adalah terhadap masyarakat non-Muslim di pedalaman Sarawak.

Menurut beliau lagi, di antara sumbangan dakwah Tokoh ini terlaksananya Kampung Darul Islam Belimbing Padawan yang merupakan kampung Saudara Kita sepenuhnya yang pertama kali diwujudkan. Kampung ini seterusnya menjadi model kepada kampung-kampung Saudara Kita yang lain.

Seterusnya sumbangan dakwah oleh tokoh ini terhadap umat Islam sendiri yang telah mengubah amalan hidup mereka termasuk dari

kalangan pegawai atasan kerajaan. Atas arahan beliau, diwujudkan program yang dinamakan Surau Setia yaitu majlis ceramah agama mingguan yang mewajibkan para pegawai kerajaan hadir. Pengurusan Surau Setia diserahkan kepada Setiausaha Kerajaan Negeri Sarawak supaya memberi tekanan kepada para pegawai berkenaan untuk hadir ke majlis tersebut. Pada kebiasannya Surau Setia diadakan pada setiap malam Jumaat dan ceramah agama disampaikan oleh *al-marhum* Abdul Kadir Hasan dan tokoh ini sendiri. Dengan ini, Surau Setia telah menyumbang kepada kesedaran di kalangan para pegawai ini untuk kembali kepada ajaran agama Islam.

## 2. Bahruddin Mansur

Beliau adalah pendakwah dari sebuah organisasi dakwah yang berpusat di Jakarta Indonesia yaitu Dewan Dakwah Indonesia (DDI). Beliau mula berdakwah di Sarawak sejak tahun 80-an bersama BINA. Beliau banyak mendampingi tokoh ini dalam kerja-kerja dakwah di Sarawak.

Menurut Bahruddin Mansur, tokoh ini mempunyai perancangan yang besar untuk survival umat Islam di Sarawak bermula dengan penubuhan BINA sebagai nadi rancangan tersebut. Menurut beliau lagi, salah satu asas utama tokoh ini menubuh BINA adalah untuk menjadi tulang

belakang kepada umat Islam sekiranya terdapat ancaman terhadap mana-mana institusi milik umat Islam yang lain. Tokoh ini juga mengasaskan Yayasan Sarawak, Lembaga Amanah Kebajikan Darul Falah, Pertubuhan Saberkas dan sebagainya.<sup>84</sup>

Dari sudut lain, Bahruddin Mansur memuji sikap dedikasi dan bersungguh-sungguh tokoh ini dalam bidang yang diminatinya. Sebagai contoh, beliau menjemput seorang guru tertinggi persilatan Ai Kido dari Jepang untuk dibawa ke Sarawak yaitu *Master* Yamada untuk mengajar seni itu. Begitu jugalah dalam bidang-bidang lain seperti ilmu *tarannum*, tarikat dan sebagainya. Beliau akan melakukannya dengan penuh perhatian dan tekun.<sup>85</sup>

### 3. Suhai Bin Hashim

Beliau adalah Ketua HIKMAH Cawangan Belaga di Bahagian Kapit. Beliau melibatkan diri dengan BINA sejak awal tahun 80-an ketika masih belia lagi. Semasa wawancara dengan penulis ini dilangsungkan, beliau telah menjangkau usia 69 tahun tujuh bulan. Menurut beliau tokoh ini pernah berkunjung ke Belaga untuk bertemu dengan umat Islam di Belaga dan menyampaikan dakwah disamping mengeratkan silaturahim dengan umat Islam setempat. Menurut beliau lagi perkembangan Islam

---

<sup>84</sup> Baharuddin Mansur (Bahagian Penyelidikan HIKMAH, Ibu Pejabat HIKMAH Petra Jaya Kuching), dalam wawancara dengan penulis pada 12 November 2012

<sup>85</sup> *Ibid.*

meningkat dengan pantas dan ketara pada era BINA. Beliau pernah menyaksikan satu rombongan non-Muslim dari etnik-etnik sekitar Belaga seperti Punan, kenyah, Kayan pergi ke Kuching untuk hadir ke majlis pengislaman beramai-ramai. Rombongan itu singgah di Kapit dan bermalam di rumah datuk beliau sehingga rumah tersebut dipenuhi oleh ahli rombongan tersebut.

Menurut Suhai, tokoh ini datang ke Belaga juga dalam rangka menziarahi datuk sebelah ibu kandung beliau dari keturunan Brunei yaitu Awang Sutoh Awang Ibrahim. Tokoh ini mempunyai salasilah dari keturunan Brunei melalui jalur sebelah ibu kandung beliau sebagaimana disebut sebelum ini.<sup>86</sup>

#### 4. Abdul Rahman Fadzail

Beliau merupakan pengerusi BINA Bahagian Miri yang pertama pada awal tahun 80-an. Beliau adalah tokoh masyarakat di Miri dan dengan memegang jawatan Temenggong bagi masyarakat Melayu di Miri. Beliau mula aktif dan terlibat dengan kegiatan-kegiatan kemasyarakatan dan kebajikan sejak tahun 1965. Beliau pernah menjabat sebagai Naib Yang Dipertua BINA pada sesi 1976-1978. Menurut beliau, tokoh ini dan BINA telah melonjakkan semangat dan kesedaran agama kepada

---

<sup>86</sup> Suhai bin Hashim (Pengerusi HIKMAH Cawangan Belaga, Kampung Melayu Belaga), dalam temubual dengan penulis 10 Mei 2015

masyarakat. Tokoh ini juga turun ke padang untuk menyampaikan dakwah. Menurut beliau tokoh ini telah berhasil membawa dakwah ke Baram dan melakukan pengislaman di Bario walaupun pada peringkat awalnya terdapat tentangan yang kuat daripada masyarakat non-muslim tempatan.

Tokoh ini merupakan individu yang mengambil berat tentang keadaan umat Islam serta amalan mereka. Beliau banyak mengadakan langkah-langkah untuk memperbaiki keadaan umat Islam untuk jangka masa panjang seperti menyediakan asas ekonomi yang mantap, perladangan, pembalakan dan seumpamanya. Bahkan tokoh ini mengadakan Surau Setia bagi memastikan ketua-ketua jabatan mengamalkan ajaran Islam dengan baik serta membuang tabiat buruk yang pernah diamalkan.

Menurut Abdul Rahman Fadzail lagi, tokoh ini seorang yang tenang dan tidak tergopoh dalam melakukan kerja atau tindakan dan juga amat gemar bergurau kepada masyarakat menjadikannya disayang. Tokoh ini memiliki peribadi yang baik, merendahkan diri dan sederhana tetapi tegas pada dasar dan prinsip agama.<sup>87</sup>

## 5. Su'udi Arof

Su'udi Arof adalah mantan Setiausaha Kerja BINA pada tahun 80-an

---

<sup>87</sup> Abdul Rahman Fadzail, mantan Naib Presiden BINA, dalam temubual dengan penulis pada 14 Mei 2015

dan berasal dari Sadong Jaya Kota Samarahan. Sebelum bekerja dengan BINA beliau terlibat dengan program yang dianjurkan oleh BINA di Sadong jaya dan bandar Kuching seperti Seni Silat Helang Putih dan Mayang Mengurai ketika belia. Menurut beliau tokoh ini telah berhasil membuka jalan mudah kepada anak Sarawak untuk mendapat tempat secara automatic untuk seramai sepuluh orang pelajar yang mempunyai keputusan SPM yang cemerlang melanjutkan pelajaran ke Universiti Malaya Nilam Puri di Kelantan.<sup>88</sup>

Dengan kemudahan ini membuka ruang yang lebar kepada pelajar-pelajar yang berasal dari Sarawak mendapat peluang belajar dalam rangka meningkatkan generasi berilmu pengetahuan tinggi di Sarawak dari kalangan umat islam.

Terdapat dua perkara yang penulis simpulkan di sini yaitu;

Pertama adalah langkah yang diambil oleh tokoh ini mengintitiskan dakwah menjadi gerakan secara kolektif melalui organisasi BINA sebagai langkah yang besar dan kedepan yang tidak difikirkan oleh tokoh-tokoh yang ada ketika itu.

Yang kedua tokoh ini telah melebarkan capaian dan pencapaian dakwah di Sarawak apabila berhasil membawa golongan non-Muslim masuk Islam dalam angka yang besar. Pencapaian ini bukan sahaja berskala besar tetapi

---

<sup>88</sup> Su'udi Arof, (Mantan Setiausaha Kerja BINA), dalam temubual dengan penulis pada May 2015